

四庫全書

子部

欽定四庫全書

子部
珊瑚網卷二十四下

詳校官中書臣沈鳳輝

編修臣程嘉謨覆勘

總校官進士臣朱鈐

校對官檢討臣李鼎元

謄錄監生臣劉福徵

欽定四庫全書

珊瑚網卷二十四下

明 汪砢玉 撰

法書題跋

海嶽名言

一作米元章
條書評

歷觀前賢論書徵引迂遠比況奇巧如龍跳天門虎卧
鳳闕是何等語哉或遣辭求工去法愈遠無益學者故
吾所論要在人人不為溢辭耳 余採隋唐至本朝書

法得一十四家 僧智永書氣骨清健大小相雜如十

四五貴冑褊性方循繩墨忽越規矩 褚遂良書如熟

馭戰馬舉動從人而別有一種驕色 虞世南書如學

休糧道士神格雖清而體氣四疲 歐陽詢書如新瘥

病人顏色憔悴舉動辛苦 柳公權書如深山得道之

士修煉已成神氣清健無一點塵俗 顏真卿書如頂

羽按劍樊噲排突硬弩欲張鐵柱將立昂然有不可犯

之色 李邕書如乍富小民舉動崛彊禮節生疎 徐

浩書如蘊德之人動容溫厚舉止端正敦尚名節體氣
純白 沈傳師書如龍遊天表虎踞溪傍神情自若骨
法清虛 周越書如輕薄少年舞劍氣勢雄健而鋒刃
交加 錢易書如美丈夫肌體充悅神氣清秀 蔡襄
書如少年女子體態嬌婉行步緩慢多飾鉛華 蘇舜
欽書如五陵少年訪雨尋雲駿馬青衫醉眠芳草狂歌
院落 張友直書如宮女插花嬌嬪對鏡端正自然別
有一種清態繼其人者誰歟有襄陽米芾

字之八面惟尚真楷見之大小各自有分智永有八面已少鍾法丁道護歐虞筆始勻而古法亡矣柳公權師歐不及遠甚為醜怪惡札之祖世始為俗書

歐虞褚柳顏皆一筆書也安排費工豈能垂世李邕脫子敬體之纖穠徐浩晚年力過更無氣骨皆不如作郎官時婺州碑也董孝子不空皆晚年惡札全無妍媚有識者當自知之沈傳師變格有起世真趣徐浩不及也御史蕭誠書太原題名唐人無出其右為司馬隸南嶽

真君觀碑極有鍾王趣餘皆不及矣

本朝太宗挺生五代人物已盡之間天縱好古之性真造八法草入三昧行書無對飛白入神一時公卿以上之所好遂悉學鍾王至李宗諤主文既久士子始皆學其書肥褊樸拙是時不謗錄以投其好用取科第自此惟趨時貴書矣

宋宣獻公綬作參政傾朝學之號曰朝體韓忠獻公琦好顏書士俗皆學顏書及蔡襄貴士庶又皆學之王文

公安石作相士俗亦皆學其體自此古法不講能隸書者武勝留後崔瑗能草書者承議郎滕中孚趙仲忽能行書者宣德郎鮑慎由能篆書者宣德郎趙霆已上是學古人書者餘未見

楊凝式字景度其書天真爛漫縱逸類顏魯公爭坐位帖紛披老筆王安石少嘗學之元豐六年余始識荆公于鍾山語及此公大賞歎其後與余書東皆此等字

唐人以徐浩書比僧虔甚失當浩大小一倫猶吏楷也

僧虔蕭子雲傳鍾法與王子敬無異大小各有分不一
倫徐浩為顏真卿辟客書韵自張顛血脉來教顏真卿
大字促令小小字促令大非古法也

歐陽詢草書也字末筆倒麼不見所出余得貞觀御府
右軍三帖末後一帖也字乃歐法所出世之真蹟與石
刻並無此也字

孫過庭草書書譜甚有右軍法作字落腳差近前而直
此乃過庭法凡世稱右軍書有此等字皆孫筆也凡唐

草得二王法無出其右

海岳以書學博士召對上問本朝名世者凡幾人海岳各以其人對曰蔡京不得筆蔡卞得筆而乏逸韻蔡襄勒字沈遼排字黃廷堅描字蘇軾畫字張友直安字上復問之曰卿何如對曰臣書刷字

諸名家評米書

東坡云海嶽平生策隸真行草書風牆陣馬沉著痛快當與鍾王並行非但不媿而已

元章少時書法蓋自沈傳師後始入大令之室結體起
軼一用其筆意此帖元章摹王獻之帖臨池用功如此
晚年放恣自成一家不復作狡獪變化矣

米禮部行書草政用大令筆意稍跌宕遂自成一家後
生習米者但得其踰繩越契之風則善學柳下惠者也
范成大跋

嶽珂英光堂帖有米元章臨智永真草千文與今本大
不同乃知古人臨帖不論形似也珂跋其後云摹臨兩

帖本不同摹帖如梓人作室梁櫨榱桷雖具準繩而締
創既成氣象自有工拙臨帖如雙鵠並翔青天浮雲浩
蕩萬里各隨所至而息寶晉蓋進乎此者也為之贊曰
永之法妍以婉芾之體峭以健馬牛其風神合志通彼
妍我峭惟妙惟肖故曰袒裼不浼夜啓不啓善學柳下
惠莫如魯男子

本朝書米蔡為冠餘子莫及君謨始學周越書其變體
出于顏平原元章始學羅遜漢王諱讓書其變體出于

王子敬君謨泉州橋柱題記絕過平原元章鎮江焦山
方丈六版壁所書與子敬行筆絕相類藝至于此亦難
矣坡贈六觀老人詩云草書非學聊自悟落筆已喚周
越奴則越之書本甚高也襄陽學記乃羅遜書元章亦
襄陽人始效其作至于筆挽萬鈞沉著痛快處法豈能
盡耶

龔聖與曰評書家謂米書如快劍斫陣以其銛利無前
故也是大不然米書超絕中自有妍美不專以險絕為

工沈慶之貌如好女每臨陣必著假面而其威武所被能使丰姿掩抑不露其英雄之能事也

徐季海書惟此一種有右軍父子筆法而無俗氣如開河碑超軼孝子碣老重然終非王家苗裔也頃見蘇子瞻錢穆甫論書不取張友正米芾余殊謂不然及見郭忠恕叙字源乃知當代二公極為別書者也

米淮陽芾摹逸少平章帖筆趣翩翩固自佳但肆筆榻放殊不廓填非古也昔榻書欲如水月鏡像者故應廓

填乃造微耳黃伯思跋

黃魯直書道媚米元章書俊拔薛道祖書溫潤

徐會稽之濁在跛偃李北海之濁在欹斜跛偃之弊流而誤吾坡公欹斜之弊流而為元章父子矣趙孟堅跋此本定州蘭亭土中所得石米元章摹入棠梨板者字雖肥骨肉相稱觀其筆意右軍清真風韻冠映一時可想也今時論書者憎肥而喜瘦黨同而妬異曾不夢見右軍脚汗氣豈可與言用筆法耶

米海嶽書如快劍斫陳強弩射千里所當穿徹書家筆勢亦窮于此然亦似仲由未見孔子時氣象耳

山谷

米襄陽書政如黃太史作詩之變芒角剝求於匱蘊川媚則蔑有其學魯獨居男子於薛道祖見之

蔡君謨所摹右軍諸帖形模骨肉纖悉具備莫敢踰軼至米元章始變其法超越規矩雖有生氣而筆法悉絕矣玉峰陸友題

唐人臨摹右軍得其形似而失其氣韵米元章得其氣

韻而失其形似

下云氣韻形似俱備者
惟吳興趙子昂得之

張雨云元章學王書而變薛河東學王者而不變

陶宗儀稱趙文敏偶得米海嶽壯懷賦一卷中闕數行
因取刻本摹榻以補其闕凡易五七紙終不如意乃嘆
曰今不逮古多矣遂以刻本完之公之翰墨為國朝第
一且猶服善如此近有一等人僅能點畫如意便自誇
大者于公寧不愧乎

子瞻似顏平原故極口平原魯直效瘞鶴故推尊瘞鶴

元章出楮河南故左袒河南河南楷似行然自有楷平
原草似楷然自有草李北海楊凝式及元章魯直無楷
笑

海嶽書于晉人最有功故其淵源高於宋一代比為慧
日峰錄一卷記惜其起語處損缺數行行筆則規模聖
教序而波法特佳識者當自著眼也陸深跋

南宮與眉山豫章莆陽擅聖宋室近時學者寡師王氏
宗祖必先事四家為襄陽之學者大抵步入狂狷允明

固亦願學而資力兼乏乃不易耳而亦不易以語人此
天馬帖為梁溪錢氏世藏其孫昌言出示舒翫未終第
覺法度森出與尋常之論大異高陽馮几人口不幾于
誤人耶昌言請識跋稍附爾爾異時締觀著力或得畦
徑一二當為再議以易此語

枝山

褚摹禊帖米元章謂褚的筆非也既稱勻填清潤又云
以意改誤易數字未有雙鉤廓填而意易者蓋唐人于河
南臨本上加雙鉤耳虎兒實知之不欲矯其父誤謾定

為諸葛正等于賜本雙鉤又非也正當作貞宋人避其廟諱故余始謂能辨陳家本作于定國耳今乃能於米家作董孤言畢不覺噴笋滿案

右米南宮真蹟妙得晉人筆而以神俊發之往往于結構外取姿韻余嘗評其書如兒駒試風劍俠入道此卷為友人李子所藏前一紙是其本色奕奕有生氣後一紙尤精不失褚河南懸腕法余愛玩久之乃以王履吉小楷南宮傳系其後而記以歲月云

又云黃長睿有書學而無書才米元章有書才而無書學以上弇州

東觀餘論

雲林子
黃伯思

自秦易篆為佐隸至漢世去古未遠當時正隸體尚有篆籀意象厥後鍾元常士季及晉王世將逸少子敬作小楷書法皆出于遷就漢隸運筆結體既圉勁淡雅字率扁而弗脗今傳世者若鍾書力命表尚書宣示世將上晉元帝二表逸少曹娥帖大令洛神帖雖經摹拓而

古隸典型具存至江左六朝若謝宣城蕭挹輩雖不以書名世至其小楷若齊海陵王志開善寺碑猶有鍾王遺範至陳隋間正書結字漸方唐初猶爾獨歐陽率更虞永興易方為長以就姿媚後人競效之遽不及二人遠甚而鍾王楷法彌遠矣

篆法之壞肇李監軍草法之弊肇張長史八分之俗肇韓擇木此諸人書非不工也而淵古人之原教俗士之升木於書家為患最深夫篆之方穩草之顛放八分之

纖麗學便可至而天勢失矣彼觀鐘彞文識漢世諸碑
王索遺迹寧不少損乎此可為知者道

章草惟漢魏西晉人最妙至逸少變索靖法稍以筆勝
世傳諸葛武侯對蜀照烈語及豹奴等章帖皆逸少書
也蕭景喬出師頌雖不追魏晉人然高古尚有遺風自
其書中觀之過正隸遠矣隋智永又變此法至唐人絕
罕為之近世遂窳然無聞蓋去古既遠妙旨弗傳幾至
于泯絕然世豈無人顧俗眼未識耳

張懷瓘論書以會稽草書第八在世蔣茂宏輩諸人下
意謂其拘法度少縱放也予謂草之狂怪乃書之下者
因陋就淺徒足以障拙目耳若逸少草之佳處蓋與從
心者契妙寧可以不踰矩少之哉若懷瓘者以形模求
字不可告以天下之妙也

唐文皇論鍾元常書云體則古而不今字則長而逾制
今觀尚書宣示諸帖字皆匾濶殊無長體豈文皇誤以
廣為脩乎

十七帖長丈有二尺貞觀中內本也凡百七行九百四
十三字逸少草書中恒赫著名帖也文皇帝購二王書
大王草有三千紙率以一丈二尺為卷取其跡以類相
從綴成卷以貞觀兩字印印之褚河南監裝率多紫檀
軸首白檀身紫羅標織成帶開元皇帝又以開元兩字
印印之跡尾列當時大臣名此帖號十七帖者以卷首
有十七字故以名凡二王書後人亦有取帖中一句語
稍異者標為帖名大約多取卷首及帖首三兩字也

王會稽七子皆能書凝操徽渙獻五人書跡具傳惟玄
肅二子未見餘皆得家範而體格不同是善學逸少書
者也猶顏延年對宋文帝自謂竝得臣筆測得臣文冀
得臣義躍得臣酒書亦猶是也

陶隱居集楊許三仙君真蹟論云楊君書最工不今不
古能大能細大較雖祖效郗法筆力規矩兼於二王掾
書乃是學楊字體勁利偏善寫經畫符與楊相似鬱勃峰
勢殆非人工所建長史章草乃能而正書古拙隱居昔

見張道思善別法書歎其神識今觀三君蹟一字一畫
皆望影懸了自思非智藝所及特天假此鑒令有以題
悟耳三君書蹟今無復有獨唐竇衆述書賦著楊真人
行書帶名六行觀隱居之論想見其清致也惜哉今亦
弗傳矣隱居書自奇世傳畫版帖及瘞鶴銘皆其遺迹
也今人罕能辨之於戲妙識遠矣知音益稀安得隱居
輩與之論書哉

後魏北齊人書洛陽故城多有遺迹雖差近古然不脫

璚表氣文物從永嘉來自北而南故妙書皆在江左
書苑云唐文皇製聖教序時都城諸釋諉弘福寺懷仁
集右軍行書勒石累年方就逸少刷蹟咸萃其中今觀
碑中字與右軍遺帖所有者纖微克肖書苑之說信然
近世翰林侍書輩多學此碑學弗能至了無高韵因自
目其書為院體由唐吳通微兄弟已有斯目故今士大
夫玩此者少然學弗至者自俗耳碑中字未嘗俗也非
深於書者不足以語此

洛人好楊凝式少師書信可傳寶但自唐中世來漢晉
書法不傳如凝式輩所祖述者不遠會稽父子筆法似
不如是洛人得楊真蹟誇詡以為希珍所謂子誠齊人
耳

紫陽先生李含光碑乃張從申書李陽冰題歐文忠不
喜從申書集古錄屢言之殊不知從申乃效子敬書頗
有東晉風尚唐人知書者多故見重于世今人反此歐
陽公初不閑法書則從申之迹見棄宜矣

近世書人惟章申公能傳筆意雖精巧不追唐而筆勢
赳赳意出褚薛上矣比來襄陽號知古法然但能行書
正章書不工愛觀古帖而議論疎濶好摹古帖而點畫
失真世言其榻本與真蹟同然比李建中周越輩則小
過也

書苑云從申結字縝密近古未有弟從師從義從約並
工書皆得右軍風規時人謂之四龍書賦以張氏四龍
名揚海內厥有季弟工夫少對右軍風規下筆斯在季

謂從申也又云從申近古所無限於聞見不多右軍之外一步不窺予觀從申雖學右軍其原出于大令筆意與李北海同科名重一時宜不虛得但所短者抑揚低昂太過又真不及行耳然唐人而有晉韻殊可佳尚

既云

從申有弟三人又云
李謂從申不可曉

王局翁云希白作字自有江左風味故長沙法帖比淳化待詔所摹為勝世俗不知爭購秘閣本誤矣

黃長睿跋章草急就補亡後

自秦同書文丞相斯作倉頡篇中車府令趙高作爰歷篇太史敬作博學篇至文園令相如作凡將篇黃門令游作急就篇皆書文之林苑欲識字者不可不知惜哉凡將以上不可復見特急就存焉者以古賢多喜書之故也其文雖出小學家而亦西京文氣未衰之際詞致雅馴故顏籀賞其清靡籀注此書嘗得皇家鍾繇衛夫人王會稽等篇本備加詳覈今世所傳惟張芝索靖二家為真皆章草書而伯英本祇有鳳爵鴻鵠等數行至

靖所書乃有三之二其闕者自母縛而下纔七百五十
字此本是已蓋唐人摹而弗填者神韻筆勢古風宛然
予遂手榻一通陶隱居謂之填郭書近世謂之雙鉤書
蓋欲知筆徑所自故爾

桑世昌澤卿論蘭亭法習

褚遂良正行全法右軍洛都袁氏家遂良書帝京篇一
卷體裁用筆竊効蘭亭

山谷遊荊州得古本蘭亭愛玩不去手因悟古人用筆

意作小楷日進曰他日當有知我者公家傳云楷法妍媚自成一家

子瞻少時學蘭亭極道媚中年以來筆墨重實李北海未足多也

今時學蘭亭者不師其筆意便作行勢正如羨西子捧心而不自悟其醜也余嘗觀漢時石刻篆隸頗得楷法後生若以余說學蘭亭當得之魯直題

南宋思陵翰墨志餘

本朝士人殊乏以字畫名世縱有不過一二數誠非有唐之比然一祖八宗皆喜翰墨特書飛白分隸加賜臣不多矣余四十年間每作字固欲鼓動士類為一代操觚之盛以六朝居江左皆南中士夫而書名顯著非一豈謂今非昔比視書漠然無當畧不為意果時移事異習尚亦與之汙隆不可力為也

本朝承五季之後無復字畫可稱至太宗始搜羅法書備盡求訪當時以李建中字形瘦健始得時譽猶恨絕

無秀異至熙豐以後蔡襄李時雍體制方如格律欲度
華駟終以駸駸不為絕賞繼以蘇黃米薛筆勢瀾翻各
有趣向然家雞野鵲識者自有優劣猶勝泯然與草木
同腐者耶

前人多能正書而後草書蓋二法不可不兼有正則端
雅莊重結密得體若大臣冠劍儼立廊廟草則騰蛟起
鳳振迅筆力穎脫豪舉終不失真所以齊高帝與王僧
虔論書謂我書何如卿僧虔曰臣正書草書第三陛下

草書第二而正書第三是臣無第二陛下無第一帝大笑故知學書者必知正草二體不當闕一所以鍾王諸家皆以此為榮名不可不務也

關

而入其室至于草書飽十七帖而變其形可謂書之兼學力天資精與神化而不可及矣

周公謹論晉人小楷

黃庭曹娥東方朔贊小楷極精配入樂毅論雖差校不及然皆墨池鳳毛也

宋仲溫手錄書法

見前者
刪去

張芝書如老松獨倚岩壑錯落盤屈時飄飄風韻

庾翼書少時與右軍齊名右軍後進庾猶不平在都下
常與人書云小兒輩厭家雞皆學逸少書及過江見右
軍所臨張芝衆帖始大驚服以為神

范懷約真書有分而草行無功故知牘簡非易

虞世南書剛而能柔却任自然其清健皆可人意如山
林之士外夫塵俗抱琴獨咏王公一旦用之于朝魯無

驕色

歐陽詢書周圍端正點畫停勻曾無虛設雖清硬中法亦用力太過如揚雄大醇小疵山濤多可少怪

褚遂良書善擇紙筆而意有餘如高祖得張良世祖得鄧禹皆謀議帷幄決勝千里

李邕書筆端巧妙格高意遠論者謂之華嶽三峯黃河一曲張旭之書奮思狂逸更無凝滯如龔遂之便

米芾負能書之名於海內其真楷篆隸不甚工惟於行

草誠入能品以芾收六朝墨副在筆端故沉著痛快如乘驄馬進退裕如不煩鞭勒無不當人意然喜效其法者不過得外貌高視濶步氣韻軒昂殊不究其中本六朝妙處醞釀風骨自然超逸也昔人謂支遁道人愛馬不韻支曰貧道特愛其神駿耳余於芾書亦然

楊凝式在五代最號能書每不自檢束號楊風子人莫測也其筆扎豪放傑出風塵之外歷後唐周漢卒能全其身名其知與書法俱高矣在洛中往往有題記平居

好事者并壁匣寘坐右以為清玩

本朝自建隆以後平定僭偽其間法書名蹟皆歸秘府
先帝時又加採訪賞以官聯金帛至遣使詢訪殆盡命
蔡京梁師成黃冕等編彙真贋備成卷帙皆用皂鸞鵲
木錦標褫白玉珊瑚為軸秘在內府用大觀政和宣和
印章其間法書以秦璽書法為寶後有內府印標題品
次皆宸翰也舍此標軸悉非珍藏其次儲於外秘余渡
江無復鍾王真蹟矣

劉正夫論好奇字

劉英伯好奇字六經自劉歆傳寫外無一難字豈可謂
無奇哉舊見魏鶴山取篆字施之行書常笑其自苦無
益鶴山書鄉字從邑有效之者卿亦從邑不知卿從節
故草書為間者即節也近年楊慈湖畫心字文本心畫
雲字在邯鄲匄匄中曲折愈不相似自書學以來鍾王
眉目可喜何嘗顛倒橫豎自不可及若總如彼所自為
於字體則謬於經傳則乖不知何所取也

朱文公議書

歐陽文忠公作字如其為人外若優游中實剛勁惟觀其深者得之黃魯直自謂人所莫及自今觀之亦是有好處但自家既是寫得如此好何不教他方正須要得恁欹斜則甚又他也非不知端楷為是但自要如此寫亦非不知做人誠實端懿為是但自要恁他放縱道夫問何謂書窮八法曰只一點一畫皆有法度人言永字體其八法行夫問張于湖字何故人皆重之曰也是好

但他是不把持愛放縱今本朝如蔡忠惠以前皆有典則及至米黃諸人出來便不肯恁地要之這便是世態衰下其為人亦然

張敬夫嘗言平生所見王荊公書皆如大忙中寫不知公安得有許多忙事此雖戲言然切中其病今觀韓魏公與歐陽文忠帖因省平日得見韓公書蹟雖與親戚早幼亦皆端嚴謹重與此同未嘗一筆作行勢蓋其胸中安靜詳審雍容和豫故無頃刻忙然亦無纖芥忙意

與荆公之躁擾急迫正相反也書札細事而於人之德性其相關有如此者

余少時喜學曹孟德書時劉共父方學顏真卿書余以字書古今謂之共父正色謂余曰我所學者唐之忠臣公所學者漢之篡賊耳余嘿然亡以應是以取法不可不端也

張南軒論蔡蘇書

蔡君謨書如禮法之士盛服齋居不敢少有舒肆之意

見者自是起敬

坡公結字穩密姿態橫生一字落紙固可寶玩而況平生大節如此竊嘗觀公議論不合于熙豐固宜至元祐初諸老在朝羣賢彙征及論役法與已意小異亦未嘗一語苟同可見公之心惟義之比初無適莫初貶黃州無一毫挫折意在他人已為難能然年尚壯也至投老炎荒剛毅凜凜畧不少衰此豈可及哉范太史家多藏公帖其間雖有壯老之不同然忠義之氣未嘗不蔚然

見於筆墨間真可畏而仰焉

陸務觀論法帖

樂毅論縱橫馳騁不似小字瘞鶴銘法度森嚴不似大字所以不可仰望也

世傳中山古本蘭亭之流帶右天五字有殘闕處於是士大夫所藏蘭亭悉然又謂樂毅論古本至一海字而止于是凡樂毅論亦至海字而止其餘妄偽亂真大抵如此庚申重九陸游務觀書

倪正父評蘇黃米諸家書

本朝書惟東坡魯直元章三家然東坡多卧筆魯直多縱筆未老多曳筆若行草尚可使作小楷如黃庭樂毅洛神則不能矣其他如蘇子美周越近世如吳說輩皆不免於俗獨蔡君謨行書既好小楷如茶譜集古錄序頗有二王楷法若他大小楷法則亦不免於俗而氣骨多不蕭散有美堂記畫錦堂記及荔枝譜諺所謂厚皮饅頭是也大抵楷法貴於端重又要飄逸難乎兩全不

可以瞞人故善書者尤以為難也

鄭子經至朴篇

至朴散而八卦興八卦興而書契肇書契肇而篆籀滋
飛天八會以前不可得而詳也皇頡以降凡變五矣其
人亡其書存古今一至作者十有三人焉予生千載之
下每覽昔人殘銘斷碣未嘗不為之歔歔而三嘆也在
昔結繩之政始分龍穗之章中輟于是蒼史氏仰觀俯
察以造六書通天地之幽秘為百王之憲章非天下之

至精其孰能與于此若稽古大禹既平水土鑄鼎象物
勒銘告成而功被萬世三代之末周籀蔚有奇秀篆隸
攸祖孔子採摭舊作緣飾篆文天授其靈勗物垂則呂
政暴興天人之道壞亂極矣李斯適際其時陶埏偃仰
專名擅作悉燔舊章天下行秦篆矣程邈參衍隸佐趨
時便宜蔡邕鴻都石經為古今不刊之典張芝鍾繇咸
得其道伯英聖于一筆書元常神妙于銘石王羲之有
高人之才一發新韻晉宋能人莫敢讐擬李陽冰生于

中唐獨蹈孔軌潛心改作過於李斯張旭天分極深渾
然無迹足以儀表衰俗五代而宋奔馳崩隤靡所底止
蔡襄毅然獨起可謂間世之傑也嗚呼書其難哉文籍
之來久矣能書者何濶希焉蓋夫人能書也吾求其能
于夫人是以難也

殫學篇

秦廢古學力書不可行矣蒙恬書經胡毋敬等剽掠遺
範造蒼頡博學諸書散落復盡然道在兩間法出於道

書雖不傳法則常在執筆貴圓字貴方篆貴圓隸貴方
圓效天方法地圓有方之理方有圓之象隸不隸吾不
知其為書也紫真授羲之其乎或曰學者以二王比
肩曰父作之子述之逸少無迹尋獻之則未至也羲之
曰意在筆先字居心後存筋藏鋒滅迹隱端而分起伏
偃仰又題筆陣圖曰夫書先引八分章草入隸字中草
書象篆隸八分相禘斯言旨哉衛氏曰善鑒者不書善
書者不鑒又刪李斯筆妙而分七勢可與八永參焉張

懷瓘十法其成頌之緒論乎禁經發諸家筆意背拋引
黃毒法趨戈曰清潤遲澁而左顧善於形容矣過衫衲
側其用閭築未善也蕭何韋誕其能署書乎或問廣成
子應侯僧一行釋徵燕卿葛氏諸作極論題署其幾法
乎曰法則法矣然衆忌諱適足以累法真卿之劍池陽
水之講臺縱橫生動不假修飾其署書之雄秀者乎陳
旅之記能持論矣世稱李邕善題署然其銘刻歐虞褚
諸公若優乎曰古之銘石典重端雅使人興起于千載

之下邕以行押相參後世詭異百出邕作俑也歐虞褚
深得書理信本傷于勁利伯施過于純熟登善少開闢
之勢柳誠懸其游張顏之閫與乎徐季沈宋諸家殆闕
其藩落者乎韓擇木韓秀實李莒李儉綽有古意太白
得無法之法子美行之昌黎知其理而功淺子厚雅有
負抱而有永興公之餘韻議者以退之為極踈厲曰彼
蓋不知九方歟之為相也黃山谷云書道弊于唐末惟
楊凝有古人筆意曰中流失船一壺千金請問宋之名

家曰錢忠懿杜祁公之流便蘇才翁倩仲之爽峭蘇子
瞻之才瞻米元章之清拔加于人一等矣踏道則未也
若夫魯直之壞變劉濤諸人所不能及惜乎態之靡靡
也然其直行多得於瘞鶴問周越李時雍鍾離景伯曰
如法何吳說張孝祥范成大法乎曰此而法天下無法
矣然則即之諸人其稱降乎曰吁磔裂塗地矣或問蔡
京卞之書曰其悍誕姦詭見於顏面吾知千載之下使
人掩鼻而過之也曰張即之陳躡之書一時籍甚豐碑

鉅刻散流江左迄今書家尚祖餘習曰速勿為所染如
深馬雖虛扁無所容其靈矣人生不幸不聞過大不幸
無恥蘇氏有言曰書于魯公文于昌黎詩于工部至矣
或曰彼人耳若夫呂巖鍾離權之瑰雄神險不其愈乎
曰吾論書不論仙然抱朴稱皇象為書聖陶真逸有頑
仙之論或問懷素草書隣于長史君謨有僕奴之譏過
乎曰人無百歲之壽而有百歲之信豪傑後起相知於
畢世之下歸然若合符節未達曰人莫不飲食也鮮能

知味也夫張公者人龍也藐焉寡儔而素欲策駑駘與
之方駕九地之下重天之巔乎然則高閑亞棲之流歟
曰二僧跚若後矣程子之持敬可謂知其本矣或曰朱
元晦諸賢其簡畢乎曰道德之充乎中而溢乎外也王
子文書感興其幾矣書學何所止曰殫身而已然則張
伯高行業未彰獨以書酣身益乎曰吾聞之精于一則
盡善偏用智則無成聖人疾沒世而名不稱彼張公者
東吳之精去之五伯再見伯英以此養生以此忘形以

此玩世以此流名

造書篇

畧節

古今書品其效尤班固古今人物表與孫虔禮姜堯章之譜何誇乎曰語其細而遺其大趙伯暉之辨妄所以作也宣和譜石峻等書其誕章之尤者也蘭亭攷俞松續考濫采羣言吾不知其然也黃伯思之論其自欺者也

虞伯生論子昂書

趙松雪書筆既流麗學亦淵深觀其書得心應手會意成文楷法深得洛神賦而攬其標行書詣聖教序宜足可無拘文法

柳公權書雖出自顏而意態自若如秦氏之御內得于心而外合于馬志取道致遠而氣力有餘徐浩書無甚議論肉多意微少然舉止精熟體不柔懦

蔡君謨書落筆嚴重則無害其為濁如荀攸外柔弱而內強勇故人謂之錦囊裏錐

米元章書筆鋒燦爛少奇多怪意到力寡正當逸處却有懶筆如高陽酒徒醉後便欲憑几元至正丙午十月

廿夜為徐泰書此

墨蹟
一冊

吉水解縉書學傳授譜

書自蔡中郎邕字伯喈於松山石室中得八角垂芒之
秘遂為書家授受之祖後傳崔瑗子玉韋誕仲將及其
女琰文姬文姬傳魏相國鍾繇元常元常初與關杞杞
學書抱犢山師曹喜劉得昇後得韋誕冢所藏書遂過

於書無以為比。繇傳庾征西翼衛夫人李氏及其猶子
會衛夫人傳晉右將軍王羲之逸少逸少世有書學先
於其父枕中窺見秘奧與征西相師友晚入中州師新
衆碑隸兼崔蔡草並杜張真集韋鍾章齊皇索潤色古
今登峯造極典午之興書家之盛若張丞相華嵇侍中
康山吏部濤阮步兵籍向侍中秀輩翰墨奇秀皆非其
匹故庾征西始疑而終服謝太傅得片紙而寶藏冠絕
古今不可尚已右軍傳子若孫及郗超謝朓等而大令

獻之獨擅厥美大令傳甥羊欣傳王僧虔王僧虔
傳梁蕭子雲阮研孔琳之子雲傳隋永興師智永智永
傳唐虞世南伯施伯施傳歐陽率更詢信本褚河南遂
良登善登善傳薛少保稷嗣道是為貞觀四家而孫虔
禮過庭獨以草法為世所賞少保傳李北海邕與賀監
知章同鳴開元之間率更傳陸長史東之東之傳猶子
彥遠彥遠傳張長史旭旭傳顏平原真卿李翰林白徐
會稽浩真卿傳柳京兆公權零陵僧懷素藏真鄔彤韋

阮崔邈張從申以至楊少師凝式凝式傳于南唐韓熙
載徐鉉兄弟宋興李西臺建中周膳部越皆知名其後
蘇太師軾黃太師庭堅米南宮芾蔡端明襄卓然為時
名家蘇舜欽薛紹彭繼之以建南渡小米傳其家法盛
行于世王庭筠米南宮之甥擅名于金傳子澹游至張
天錫元初鮮于樞伯機得之獨吳興趙文敏公孟頫始
事張即之得南宮之傳而天資英邁積學功深盡掩前
人超入魏晉當時翕然師之康里平章子山得其奇偉

浦城楊翰林仲弘得其雅健清江范文白公得其洒落
仲穆造其純和及門之徒惟桐江俞和子中以書鳴洪
武初後進猶及見之子山在南臺時臨川危素太僕饒
介介之得文敏傳授而太樸以教宋璚仲珩杜環叔循
詹希元孟舉孟舉少親受業子山之門介之以授宋克
仲溫而在至正初揭文安公亦以楷法得名傳其子法
其孫樞在洪武中仕為中書舍人與仲珩叔循聲名相
埒云

饒介字介之號醉翁華蓋山樵浮邱公童子亦曰
介叟臨川人遊建康丁仲容壻畜之後卒于姑蘇

時歲丁未宋克字仲溫一字克溫吳郡人卒官鳳翔府同知時洪武丁卯宋璉字仲珩金華人太史潛溪公仲子仕止中書舍人卒于洪武辛酉俞和字子中號紫芝樵者桐江人寓居錢塘洪武中以布衣卒年八十餘杜璵字叔獮廬陵值夏人卒官水部員外郎時洪武戊辰唐希元後更名希原字孟舉新安人號逸庵丙寅訥吏幼從父官勝國至洪武初為鑄印副使後卒官中書舍人胡布字子申盱江人一字建民得書法于宋克一云或謂與克同受學紹興老僧云揭樞字平仲豐城人

右此文後有春雨二字用硃界行表白紙寫或正或行最為神妙蓋先生下錦衣獄春雨必為指揮使紀綱書之而流落他家今為南京刑部尚書楊寧所得

余又得先生遊絲字二幅於陝西秦府因併識之天
順三年春月王佐識

祝希哲評勝國人書

虞集如鹵簿禮官贊導應節結束美姿稍遠大雅鮮于
樞如三河壯俠長袖善舞豪鷲自擅時落胡俗鄧文原
如疊壁層城不勝沈實饒介如時花沐雨枝葉都新張
雨如道士醮詞雖禮而野倪璜如金錢野菊畧存別韵
楊維禎如華譯夷語自墮侏僂陳壁如有若據坐尚有

典型宋克如初造卣彝忽見三代解縉如盾郎執戟列
侍明光

又論楷法

顏真卿黃庭經楷而不小褚遂良西昇經小而不楷一
君欲靜二臣欲平三佐四使以次短小此一法也

徐文長評字手蹟

黃山谷書如劍戟構密是其所長瀟散是其所短
蘇長公書專以老樸勝不似其人之瀟灑何耶

米南宮書一種出塵人所難及但有生熟差不及黃之
勻耳

蔡書近二王其短者畧俗耳勁淨而勻乃其所長

孟頫雖媚猶可言也其似算子率俗書不可言也嘗有
評吾書者以吾薄之豈其然乎

倪瓚書從隸入輒在鍾元常薦季真表中奪舍投胎古
而媚密而散未可以近而忽之也

吾學索靖書雖梗槩亦不得然人並以章草視之不如

章稍逸而近分索則起而傲篆

分間布白指實掌虛以為入門迨布勻而不必勻筆態入淨靜媚天下無書矣掘入節乃大忌

雷大簡云聞江聲而筆進噫此豈可與俗人道哉江聲之中筆法何從來哉 隆慶庚午元日醉後呼管至無

他書漫評古人何足依據

先生評各家書即效各家體字畫奇肖傳有石文

又跋停雲館帖

祝京兆書乃今時第一王雅宜次之京兆十七首書固

亦縱然非甚合作而雅宜不收一字文老小楷從黃庭
樂毅來無間然矣而獨收其行書早朝詩十首豈後人
愛翻其刻者詩而不及計較其字耶

王元美藝苑評

書家者流稱鍾張義獻古雅之士徃徃左袒鍾張華俊
之儔則必服膺義獻今合諸家之論可以類推王羲之
云頃尋諸名書鍾張信為絕倫其餘不足存又云吾書
比之鍾張鍾當抗行或謂過之張草猶當雁行然張精

熟池水盡墨假令寡人耽之若此未必謝之羊欣云羲之便是小推張不知獻之自謂云何又云張字形不如右軍自然不如小王謝安嘗問子敬君書何如右軍答云故當勝安云物論殊不爾子敬答云世人那得知梁武帝云世之學者宗二王元常逸跡魯不睥睨羲之有過之之論後生遂爾雷同元常謂之古肥子敬謂之今瘦張芝鍾繇巧趣精細殆同機神肥瘦古今豈易致意逸少至學鍾書勢巧形密及其獨運意疎字緩又子敬

之不迨逸少猶逸少之不迨元常學子敬者如畫虎也
學元常者如畫龍也陶貞白答梁武帝云伏覽書論使
元常老骨更蒙榮造子敬懦肌不沈夜泉逸少得進退
其間則玉科顯然可觀又云此世皆高尚子敬海內非
惟不復知有元常於逸少亦然今奉此論自舞自蹈未
足逞泄日月願以所摹竊示洪遠思曠此二人皆是拘
思者必當仰贊踴躍有盈半之益蕭子雲上武帝啓云
臣昔不能拔賞隨世所貴規模子敬多歷年所始見勤

旨論書一卷商畧筆勢洞達字體又以逸少不及元常
猶子敬不追逸少因此研思方悟隸式始變子敬全法
元常庾肩吾云張工夫第一天然次之鍾天然第一功
夫次之王功夫不及張天然過之天然不及鍾功夫過
之唐太宗云鍾雖擅美一時亦為過絕論其盡善或有
所疑至于布纖濃分疎密霞舒雲卷無所間然但其體
則古而不今字則長而逾制語其大量以此為瑕獻之
雖有父風殊非新巧觀其字勢疎瘦如隆冬之枯樹筆

蹤拘束若嚴家之餓隸其枯樹也雖槎枿而無屈伸其
餓隸也則羈羸而不放縱詳察古今研精篆素盡善盡
美其惟王逸少乎觀其點畫之工裁成之妙烟霏露結
狀若斷而還連鳳翥龍翔勢如斜而反直翫之不覺其
倦覽之莫識其端心慕手追此人而已孫過庭云元常
專工于隸書伯英尤精于草體彼之二美而逸少兼之
擬草則餘真比真則餘草又云以子敬之豪翰擅右軍
之筆札雖復粗傳楷則實恐未克箕裘是知逸少之比

鍾張則專博斯別子敬之不及逸少無或疑焉

張懷瓘云若真書古雅道合神明則元常第一若真行
妍美粉黛無施則逸少第一若章草古逸極致高深則
伯度第一若章則勁骨天縱草則變化無方則伯英第
一其間備精諸體唯獨右軍次至大令然子敬可謂武
盡美矣未盡善也逸少可謂韶盡美矣又盡善也

山谷云右軍似左氏大令似莊周

宋齊之際右軍幾為大令所掩梁武一評右軍復伸唐

文再評大令大損若唐文之論是偏好語不足以服大令心也人謂右軍內擲故森嚴而有法大令外拓故散朗而多姿法自兼姿姿不能無累法也後人學右軍終不能似大令已自退漏李北海蘇眉山趙吳興筆然則大令之於右軍直父子耳不可稱伯仲也

抱朴子曰吳之善書者則有皇象劉纂岑伯然朱季平中州則有鍾元常胡孔明張芝索靖並用古體俱足周事飄乎若起鴻之乘勁風騰鱗之躡驚雲

按南史謂劉休者與王僧虔同省而是時海內俱習羊
欣書以右軍跡涉輕微多所不好休獨重之自是右軍
之書復盛後至梁武時陶貞白尚云比世皆高尚子敬
不復知有元常逸少亦然然則右軍之書得劉休而振
得梁武而著得唐文而後大定猶之顧凱之畫亦至唐
始定也羊欣學子敬者也故武帝評子敬為河朔子弟
舉體充悅然沓拖不可耐而評羊欣如婢學夫人舉止
羞澁是以文皇詆子敬為餓隸而學敬元者時人譏以

為重儻子敬餓隸敬元成一重儻矣然同一人書也餓隸之與沓拖子弟一瘦一肥母乃太相牴牾

武帝評蕭思話書仙人嘯樹而張伯英如漢武好道憑虛欲仙欲仙尚未仙也漢武欲仙則又去仙遠也伯英乃不如思話乎

梁武始重元常而下子敬特許逸少踴躍其間觀陶隱居所云元常朽骨更蒙榮造子敬懦肌不論長夜又武云逸少學鍾勢巧形密及其獨運意疎字緩然則太平

寺主臨池之趣全在鍾也及攷竇泉述書賦高祖叔達
恢弘厥躬泯規矩合童蒙張懷瓘書品云狀貌亦古乏
於筋力既無奇姿異態有減于齊高然則梁武帝之聲
價不振實以學元常之故也學鍾張殊極不易不得柔
中之骨不究拙中之趣則鍾降而笨矣不得放中之矩
不得變中之雅則張降而俗矣吾嚮者閱隋僧智果書
梁武帝評鍾司徒字有十二種意外巧妙絕倫多奇後
又有鍾繇書如雲鶴遊天羣鴻戲海行間茂密實亦難

過語以為不應重下評意所謂司徒者繇子會也及覽前輩題評以十二種意外歸之太傅吾竊非之載閱繇父子本傳繇不為司徒會加司徒雖尋伏誅而所稱司徒者必會矣

然又以梁武與陶隱居論書至數十往復皆不及會不應稱之若此及閱袁昂本文所謂十二種云云乃在啓內勅旨具云如嚮所評臣謂鍾繇容氣密麗若飛鴻戲海舞鶴遊天等語蓋重贊之也此外又有武帝觀鍾繇

書法十有二意云平直均密鋒力輕快補損巧稱字外之奇文所不書然則袁昂之稱司徒十二種法正謂繇也吾家蓄太傅薦季直表黃初二年司徒東武亭侯蓋是時華歆辭疾繇實轉司徒四年遷太尉而歆復代之史有脫漏故耳二者實可相證因記於此

鍾太傅七十六其子司徒僅四十五右軍五十九子大令四十三天假以年不果勝尊公乎曰不爾格已定矣假之年有小變而不能有所加也

右軍之書後世摹倣者僅能得其圈密已為至矣其骨在肉中趣在法外縈勢游力淳質古意不可到故智永伯施尚能繩其祖武也歐顏不得不變其真旭素不得不變其草永施之書學差勝筆旭素之書筆多學少學非謂積習也乃淵源耳

顏書貴端骨露筋藏柳書貴適筋骨盡露旭素之後不得不生譬光高閑顏柳之餘不得不生即之溥光智永伯施有書學而無書才顛旭狂素有書才而無書學河

南北海有書姿而無書禮平原誠懸有書力而無書度
楊用修云張旭妙於肥藏真妙於瘦以予論之瘦易而
肥難用修此語未必能真知書者筆肥則結構易密筆
瘦則結構易疎此瘦難而肥易也唯是既成之後瘦近
勁勁近古肥易豐豐近俗耳伯高之所以妙在肥而不
肉也

僧亞栖云書貴能變方自成家主右軍變白雲歐陽詢
變右軍柳公權變歐陽此殆是嚙語白雲先生何人亦

未有書蹟存世蓋右軍偶一言之大抵托辭耳歐陽書
法實一變然非變右軍若柳之於歐法少變而意故不
變也

山谷云王右軍初學衛夫人小楷不能造微入妙其後
見李斯曹喜篆蔡邕隸八分于是楷法妙天下張長史
觀古鍾鼎銘科斗篆而草聖不愧右軍父子易有云引
而伸之觸類而長之天下之能事畢矣

五代時楊少師凝式黃魯直極重之謂為散僧入聖又

謂可繼顏魯公釋懷素楊於今隸極拙魯直所推行草耳而余見其一二行皆不甚合作聞朱象玄有韭花帖甚佳未及見之

宋初王待詔著宋宣靖李西臺蘇參政皆稱名書家者然不甚得法山谷評待詔如小僧縛律西臺如講僧參禪然待詔猶有晉人意范文正伯夷頌見推亦以其人耳杜祁公蘇長史皆學懷素杜瘦而生蘇瘦而弱第覺玉潤微勝水清蔡忠惠略取古法加以精工稍滯而不

大暢蘇文忠正行出入徐浩李邕擘窠大書源自魯公而微歆近碑側記行草稍自結構雖有墨豬之誚最為淳古黃山谷大書酷做瘞鶴狂草極擬懷素姿態有餘儀度少乏米元章源自王大令褚河南神米奕奕射人終愧大雅是四君子者號為直無措矣

米元章有書才而少書學黃長睿有書學而少書才以故評騭古人墨刻真贋亦有相牴牾者然長睿引証各有據依不若元章之孟浪也如謂鍾太傅尚書宣示為

右軍臨白騎遂帖為大令臨蓋不唯太傅宣示已殉王
修葬而開元中滑臺人家用右軍扇書臨宣示大令臨
白騎二帖應募入內府其事甚明謂長風帖為逸少少
年未變體書蓋以右軍別帖有長風范母子語可證也此
外辨右軍自適得書至慰馳竦耳酸感至此加下滯窄
相安知噉豆鼠伏想嫂等濶伯英殊愁體太今而乏古
大令疾不退至分張筆過流而少節或以此疑非二公
書可也元章論書見右軍稍大而逸者便以為子敬

見伯英近今者與子敬近縱者便以為伯高藏真愚又推黃米之旨謂伯高僅有章法而無變法子敬僅有破體而無狂草則不敢信也按張懷瓘明言章草之書字字區別張芝變為今草拔茅連茹上下牽連或借上字之下而為下字之上奇形離合數意兼包唯王子敬明其心指故稱一筆書者起自伯英也又云伯英奴為今草天縱尤異率意超曠無惜是非至于蛟龍駭獸奔騰拏攫宋室之冠然小楷絕響矣山谷推王文公書似楊

少師章惇有鍾王法談者以為曲筆蔡京卞兄弟皆擅書名御府法書墨妙皆其評跋彼人縱極八法無取一長況未必耶

唐文皇以天下之力募法書以取天下之才習書學而不能脫人主面目玄徽亦然智永不能脫僧氣歐陽率更不能脫酸餽氣旭素顏柳趙吳興不能脫俗氣南晉宋齊之間可以脫矣

宋齊之際人語曰買王得羊不失所望蓋時重大令而

敬元為大令門人妙有大令法者也中睿之季時人語曰買褚得薛不落節蓋時重河南而少保為河南甥妙有河南法者也二事可謂切對

李北海在唐人書品中不甚煥煥而趙文敏法之便自名世北海傷佻然自雅文敏稍穩然微俗眉山亦嘗學北海不如其學平原也孫虔禮書書述謂其萬字一類風行草偃輕之也至矣今所書書譜令後人極力摹倣尚自隔塵以此知古人不可及也

子瞻似顏平原故極口平原魯直效瘞鶴故推尊瘞鶴
元章出諸河南故左袒河南河南楷似行然自有楷平
原草似楷然自有草李北海楊凝式及元章魯直之勢心
手隨變窈冥而不知所如又云子敬如蹴海移山翻濤
破嶽懸崖墮石驚電遺光此豈非草聖之極耶攷前後
書亦未必似伯高蓋伯高時有肥筆渴筆不若是之勻
和也若託桓江州一書又多逸少語子敬亦不合書之
覺思光為近至于右軍雖結構緊密而變化靈異又不

可以一節為拘也

楊用修云古人例多能書如管寧人但知其清節而不知其銀鈎之敏又引管寧別傳云寧字畫若銀鈎及茅山碑云管寧銀鈎之敏是也余固知其誤按索靖字幼安其章草法有銀鈎蠶尾及考陶隱居解真碑云幼安銀鈎之敏允南風角之妙正謂索靖也蓋管寧亦字幼安用修誤以為寧遂併其姓名改之耳考寧三國志註有高士傳傳子諸書俱無銀鈎語又云劉曜人知其儻

凶而不知其字畫之工註見草書韻會當是時劉聰劉曜皆能書而聰之獍凶大出曜上俱見本載記用修又誤以劉德升為劉景升而云即表也表初在黨人中俊厨顧及之列其人品之高可知此尤可笑

虞伯生謂坡谷出而魏晉之法盡米元章薛紹彭黃長睿諸公方知古法而長睿所書不逮所言紹彭最佳而世遂不傳米氏父子最盛行舉世學其奇怪槩流金朝而南方獨盛遂有張子湖之險澁張即之之思謬極矣

此語大自有理又獨稱吳說傳朋書法深穩端潤非近
時怒張筋脉屈折生柴之態且謂至吳越見傳朋書最
多皆隨分贊歎圖來者稍知正法今傳朋書世遂少見
紹彭號翠微居士余有其詩數紙緊密藏鋒得晉人意
惜少風韻耳

鐵圍山叢談謂其父京善榜書妙出四家之工此雖曲
筆然亦必有可觀者米芾元章自負以為前無古人然
是行筆非真筆也

用修又云南唐王丈秉工小篆不在二徐下又有王逸
老者善篆與八分其命名乃欲抗右軍不知何代人疑
即文秉也按陶九成書史王升字逸老號羔羊居士草
書殊有旭顛轉捩態宣和間進所作草書內庭稱之用
修似未之見新鄭高少師拱藏東坡草聖醉翁亭記并
石本跋細閱無一坡法而渴筆遒逸飛動中有正書却
近俗吾斷以為逸老書蓋南渡以後諸公不能辨此元
人却不能作此結法也

自歐虞顏柳旭素以至蘇黃米蔡各用古法損益自成一家若趙承旨則各體俱有師承不必已撰評者有奴書之誚雖則太過然謂直接右軍吾未之敢信也小楷法黃庭洛神於精工之內時有俗筆碑刻出李北海北海雖佻而勁承旨稍厚而軟惟於行書極得二王筆意然中間逗漏處不少不堪並觀承旨可出宋人上比之唐人尚隔一舍

楊又引東坡跋希白作字自有江左風味故長沙法帖

比淳化為勝世俗不察爭訪閱本誤矣乃知潭帖勝淳
化多矣希白錢易也按希白乃潭州僧希白耳書家謂
其有筆意而多率直無縈迴縹緲之勢楊以幼安為管
寧以希白為錢易其孟浪殊可對也

元人自趙吳興外鮮于伯機聲價幾與之齊人或謂勝
之極圓健而不甚去俗鄧文源有晉人意而微近粗庫
庫子山有韻氣而結法少疎然是三人者吳興流亞也
虞伯生差又雅鮮于必仁朗朗有父風揚曼碩父子美

而近弱張伯雨健而近佻柯敬仲老而近粗班彥功少頗適爽晚成惡札龔璚陳深輩皆長于題跋倪元鎮雖微有韻而未成長人或許以得大令法何也元鎮以稚筆作畫尚能于筆外取意以稚筆作書不能于筆中求骨詎宜以汎愛推之也

正鋒偏鋒之說古本無之近來專欲攻祝京兆故借此為談耳蘇黃全是偏鋒旭素時有一二筆即右軍行草中亦不能盡廢蓋正以立骨偏取態自不容已也文待

詔小楷時時出偏鋒固不特京兆何損法書解大紳豐人翁馬應圖縱盡出正鋒寧救惡札不識下字人妄談乃爾可恨可笑

張即之非不適勁而粗醜俗惡種種可恨是顏柳之疎裔辱家風者解大紳張汝弼非不圓熟而疎軟村野種種可鄙是旭素之重儻壞家法者

臨書易得意難得體摹書易得體難得意臨進易摹進難離之而近者臨也合之而遠者摹也

蒼頡九篇相傳是李斯其第九章乃云狝信是陳狝韓
信劉京是大漢西土是長安右軍少從丞相渡江北蹤
永絕其題筆陣圖云北游名山比見李斯曹喜等書又
之許下見鍾繇梁鵠書之洛下見蔡邕石經二體書始
知學衛夫人徒費年月王著集淳化帖有漢章帝書千
字文紕繆如此徒資嗚噓

法書中有王右軍千字文昔賢作笑端蓋知其為周興
嗣撰不應右軍預有之然梁武帝命殷鐵石摹取右軍

千字命興嗣次韻故當有右軍千字文非謬也又有衛夫人筆陣圖右軍題筆陣圖後及右軍筆勢圖一章筆勢論十二章昔賢皆辨其妄然是六朝善書者擬作苟能熟覽思亦過半矣

孫過庭云樂毅論則情多怫鬱東方贊則意絕瓌奇黃庭經則怡懌虛無太師箴又縱橫爭折蘭亭之興集思逸神超私門戒誓情拘志慘愚謂此在覽者以意逆之耳未必右軍作書時預有此狡獪也又一云黃庭如飛

天仙人洛神如凌波神女曹娥碑如幼女漂流于風浪間

朱長文作續書譜而進石曼卿蘇子美於妙退裴行儉孫虔禮王紹宗李邕鍾紹京韋陟賀知章裴休於能吾未敢信也

閣帖真書自鍾太傅宣示外獨有王世將僧虔兩疏啓耳行草自二王外獨有皇象索靖及亮白一紙耳何也以其體最古雅不落塵也

顏魯公家廟碑今隸中之有小篆筆者歐陽蘭臺道因
碑今隸中之有古隸筆者皇象天發碑分篆中之有章
法者瘞鶴銘行書中之有古隸者

懷琳大急就嵇康絕交書皆托之右軍以應貞觀之
募第結法雖沓拖多卧勢不能作山陰內擲筆然圓熟
輕俊不妨張翼之亂真也

千古楷行之妙無過鍾王鍾王之跡妙者宣示樂毅蘭
亭而已 樂毅論搨本佳者猶可什倍它刻也

墨池環錄

右軍字似左傳大令字似莊周山谷為此言亦猶東坡以杜子美比司馬遷以江瑤柱比荔枝也

孫過庭云既得平正須追險絕書家以險絕為功惟顏行與景度草得之

吳寬云稱善書者必曰師鍾衛及觀顏柳諸家異體而同趣亦未必不自衛鍾來也若夫宋之蘇黃米蔡羣公交作極一代書家之盛其構勢雖各不侔要之於理又

不能外顏柳他求者

書譜雖運筆爛熟而中藏軌法故自森然

董玄宰品書

書家以分行布白謂之九宮元人作書經云黃庭有六分九宮曹娥有四分九宮是也

內景經全在筆墨畦逕之外其為六朝人得意書無疑今人作書只信筆為波畫耳結構縱有古法未嘗真用筆也善用筆者清勁不善用筆者濃濁不獨連篇各體

有分別一字中亦具此兩種不可不知也

唐模右軍真跡以十七帖為致佳余臨數十本皆為好事者取去亦復有贋本如此本差稱意乃以王方慶進帖筆法參合用之所謂萬歲通天帖者是也

余曾有右軍行穰帖真蹟十五字正是十七帖一種書及武林楊侍御自安福傳來唐摹絕交書與行穰帖同中缺鸞字乃悟為右軍書蕭寯所摹避子鸞諱而後人誤以為李懷琳耳

楷書以智永千文為宗極虞永興其一變耳文徵仲學千文得其姿媚予以虞書意入永師為此一家筆法若退穎滿五簾未必不合符前人顧經歲不能成千字卷冊何稱習者之門自分與此道遠矣

虞永興常自謂于道字有悟蓋於發筆處出鋒如抽刃斷水正與顏太師錐畫沙屋漏痕同趣前人巧處故應不傳學虞者輒成算子筆陣所訶以此

李北海書荆門行刻於羣玉堂帖予疑李北海詩在太

白集中者皆沉鬱高古無此流易及觀王建詩有荆門
行乃知宋人所集雲麾碑等石刻蒙之北海也羣玉帖

有虞永興馬贊亦見柳州集

辛酉十月朔

楊少師步虛詞帖即米老家藏大仙帖也其書騫翥簡
澹一洗唐朝安媚之習宋四大家皆出於此余每臨之
亦得一斑

蔡忠惠公書畫錦堂記凡一字數十更存其合者纔得
顏碑什七耳今日得宋榻徐季海涪州府君碑以其意

為此如黃金鑄范少伯一鑄而就正以速成自喜不計

工拙也

庚申八月朔

王履道評東坡書云世學公書衆矣劍拔弩張驥奔猊
抉則不能無至於尺牘狎書姿態橫溢不矜而妍不束
而整不軼而豪蕭散容與霏霏如甘雨之霖森疎掩映
熠熠如從月之星紆徐宛轉纚纚如紫蘭之絲恐學者
所未能至也

此余學戎輅表
王廩二表近之

國朝書法當以吾松沈民則為正始至陸文裕正書學

顏尚書行書學李北海幾無遺憾足為正宗非文待詔所及也然人地既高門風亦峻不與海內翰墨家盤旋賞會而吳中君子鮮助羽翅惟王弇州先生始為拈出然蘭之生谷豈待人而馥哉

荊州仲宣樓所刻登樓賦為吾松喬懋敬書喬素無書名彼中士大夫亦不知為手也喬曾為荊南觀察乃從游莫廷韓是龍所書今為正之

松江董原正為玄宰先生從兄工翰墨而蚤世人皆

知有玄宰而董氏書法開山肇自原正罕知之者有
雙鉤宋本十七帖在吾禾高公玄家

陳眉公筆記

宋時傳三昧蘭亭出于杜器之杜畜百本而唐刻為第
一杜名寶晉其有寶晉印者不獨老米也

東坡書是學王僧虔而歷代評者謂學徐浩政不知浩
故僧虔衣鉢耳東坡草亦學長沙今傳醉翁亭未必是
真六一居士琴操得之

東坡詩卷有一跋云觀此真跡殊覺偽者甚可笑也周公謹極喜此跋可謂善下語余嘗謂多見石刻少見真蹟往往覆以真者為偽此豈眼中有筋者乎

余皇天藻飛翔雅好書法每携獻之鴨頭丸帖虞世南臨樂毅論米芾文賦以自隨中書舍人趙士禎為言如此儒又考右軍曾書文賦褚河南亦有臨右軍文賦趙子昂亦書文賦

李君實評帖

沈存中云唐太宗力購羲之真跡唯樂毅論乃右軍親筆於石而鐫之以為家法者昭陵之殉亦以其石便于甃耳洎溫韜盜發其石已碎用鐵索之皇祐中高紳學士之子安世為錢塘主簿存中就其家見之末後獨一海字竹嬾十年前購得一本正海字獨留本也但其闕處有斜書修字數個蓋歐陽文忠公再拓本也昔年於姑蘇韓氏見一絹素臨本相謂以為右軍手書可謂不識源委者矣

樂毅論小中有楷黃庭經楷中有小東方朔畫贊五分
中有方丈洛神賦方丈在五分中曹娥碑五分字四分
畫力命表三分畫五分字此書家教典也不講求何由
修證公孫大娘舞劍擔夫與公主爭道雖畫沙折釵股
屋漏雨蓬振沙飛怒猊渴驥此書家禪案也不參透何
由悟入

樂毅論王著所書李白狂草葛叔忱所書絕交書李懷
琳所書大字蘭亭叙徐鉉所書天地間偽物亦有不可

磨滅者

宋黃伯思東觀餘論辨駁古今法書最為精刻乃其辨黃庭經一節實欠詳審伯思曰黃庭經帖為逸少書僕攷之非也按陶隱居真誥翼真檢云晉哀帝興寧二年南嶽魏夫人所授惟有黃庭經一篇得存蓋此經也逸少以穆帝升平五年卒後二年為興寧二年此經始降逸少安得預書之又按梁虞和論書表云山陰壘釀村養鸞道士謂羲之曰久欲寫河上公老子練素已具無

人能書府君能自屈書兩章更合羣以奉義之為停半
日寫畢攜鵞去晉書本傳亦著是說然隱居與梁武啓
又云逸少有名之蹟不過數首黃庭勸進樂毅等不審
猶有存否蓋此啓在著真誥前未之考耳而李太白乃
有黃庭換白鵞之句相習之謬也伯思自以為至當矣
不知右軍寫道德經換鵞又寫黃庭經換鵞自是兩番
事而太白詩亦兩見一云右軍本清真瀟灑在風塵山
陰遇羽客要此好鵞賓掃素寫道德筆精妙入神書罷

籠鷺去何曾別主人一云鏡湖清水漾晴波狂客歸舟
逸興多山陰道士如相見應寫黃庭換白鷺實互之也
考道藏黃庭有數種有內景黃庭有外景黃庭又有黃
庭遁甲緣身經黃庭玉軸經魏夫人所出乃內景一種
係楊真人義寫其外景經老君所作先出行世右軍所
書兩不相溷也張懷瓘書斷張彥遠法書要錄並載右
軍書黃庭六十行褚遂良右軍書目黃庭經書與山陰
道士其時真蹟自在又武平一徐氏法書記親在禁中

見武右曝書太宗所遺者六十餘函有黃庭何所復疑
哉他人無誤正伯思自誤耳

千字文前行書勅散騎員外郎周興嗣次韻考勅命之
制始於唐當是書梁字之誤也又梁武令殷鐵石榻二
王書今大令帖中有稱鐵石者即是殷所書而王著輩
錯著之耳此亦殊非細故黃長睿赦而不攻何也

孫過庭書可謂變動之極矣昔人又以千字一律如風
偃草短之何也

米南宮書大小天馬賦有掣銜頓轡不受羈絡之氣山
谷注李伯時所寫天閑六馬贊矜栗聳峙如就駕鑾輿
排仗閭閻蓄千里遼邁之意而不敢逞若坡翁作馬券
與李方叔則高朗卓犖宛然龍駉步驟延頸顚目以顧
草澤之羣三公筆墨變化往往隨事注精以展其妙如
此

古人論行書云八面拱心而無橫畫余向未薦此旨今
春得米元章書朱樂圃墓表逐字玩之見其揉團湊合

無有間隙乃始了然今人或謂學蘇米則沓拖不緊峭
是未得真蹟到眼縫耳

米元章論書於道君前曰蔡襄勒字沈遼排字黃庭堅
描字蘇軾畫字上問卿何如對曰臣書劖字世皆不解
其何語余為銓注曰勒字顏法也描字虞永興法也畫字
徐季海法也劖字本出飛白運帚之義意信肘而不信
腕信指而不信筆揮霍迅疾中含枯潤有天成之妙右
軍法也隱然凌轢諸老自占一頭地

姑壇記尤獨步者莫方伯張南安以草書勝陸詹事臨
摹趙松雪大佳二沈公則有楷書蒙宸眷最渥陳別
駕自成一家亦頗適勁吳中草書當以祝京兆第一然
畧少風骨耳文大史陸尚寶則楷書勝太史如文賦小
楷尤精絕可愛王太學行書自一種風度而白雀寺臨
沒之筆尤奇陳方伯惟扁額大字擅長書家彭徵君作
楷近顏真卿俞山人作楷近虞世南陸尚寶子傳廷試
時內閣夏公言手具卷歎曰文漢魏而書晉唐擬第一

上嫌其名置之二甲命矣

墨花閣雜誌

洛陽李處權云古今書稱右軍為首正書見曹娥碑妙絕超古與鍾元常抗衡黃庭經樂毅論若出兩手行書見蘭亭叙高風勝韻為一代冠

秦太虛云黃庭遺教皆非逸少之蹟歐陽文忠公嘗謂黃庭特後人緣山陰換鵝事附並遺教出於唐寫經手及精考蘭亭樂毅論然後知文忠之言為不謬也

東坡書劉景文所藏王大令帖詩云君家子敬十二字
氣壓鄴侯三萬籤

張愛賓稱惟王羲之能為一筆書陸探微能為一筆畫宋
嚴羽卿論詩姜堯章論書皆精刻深至具有卓見及所
自運顧遠出諸名家後大抵議論與實詣確然兩事議
論者識也實詣者力也力旺者能蔑識識到者又能消
力語云識法者懼每多拘縮天趣不得泛溢也觀白石
書詠滄浪詩自當得之

元大德間錢塘錢國衡刻十種蘭亭筆法咸有異趣南
宋內府五十餘種與韓氏羣玉堂賈氏悅生堂本爾時
猶有存者故國衡得選其萃耳

趙松雪云古人作字多不用濃墨太濃則失筆意然義
之書墨嘗積三分何也東坡真蹟墨如漆隱起楮素之
上山谷亦謂其用墨太濃而風韻有餘然則松雪所云
特楷書耳行書則不然

樵史品三吳書

雲間陸應陽云王弼州序三吳書家而漫及若干人第
收其虛聲耳何足為公論余嘗擇其名不愧實者於蘇
得八人焉祝京兆允明文待詔徵明王太學寵陳方伯
漉陸尚寶師道陳太學道復彭徵君年俞山人允文於
松得七人焉沈學士度陳別駕璧沈大理桀張南安弼
陸詹事深莫方伯如忠俞父子野先生

識者謂先君子行草真楷出入晉唐而做顏魯公麻畫
張桓侯不特有八分刁斗銘又有流江縣記功碑云漢

將張飛率精卒萬人大破賊首張郃于八濛立馬勒石
董北苑云劉德升為書家祖師鍾繇胡昭皆受其學昭
肥鍾瘦各得一體

定武本世罕傳已久即周憲王郎中所鑄五種蘭亭其
間肥瘦不一行楷雜亂非復右軍故步矣相傳定武為
歐陽率更臨則楷法多褚河南臨則行法勝米海嶽筆
古佻達故不欲為定武左袒即今所摹褚河南蘭亭亦
我用我法以意為之耳然生趣森勃超然凌空之態仍

不減山陰面目也

唐書學有通微院體

鍾紹京景龍中以院總監從討韋氏有功性嗜書家藏
王羲之獻之褚遂良書至數十百卷以善書直鳳閣武
后時榜諸宮殿明堂及銘九鼎皆紹京書也其字畫妍
媚遒勁有法誠少與為比

米南宮稱法書曰墨王可謂極稱非右軍大令東武亭
侯不足當也

懷素書意在筆前多意到而筆不到趙孟頫書弱中示競亦竟若綿裹鐵云

鮮于奉常公常見葉秋臺書反覆諦視至欲下拜

昔管仲變井田而成內政孔明變內政而成八陣李衛公變八陣而成六花君謨變右軍平原而成忠惠此子臧所謂太上達節者也

王著閣帖誤人千載世俗莫覺爭相寶尚不幾享弊帚以千金哉自米一鑒而偽分黃再鑒而真出于是博古

家始知不誣古矣此卷大令書標為澄清堂世傳賀蘭
所摹然書譜未載不知何據余觀其神骨冷冷結構道
逸高出淳化十倍內領動等五帖又淳化中所無而他
刻亦未始見尤可寶也卷後附索靖出師頌鍾繇賀捷
表按出師頌昔人定為蕭子雲賀捷則鍾真筆二帖俱
為希跡用以壓卷者蓋人由王索而窺元常真為百尺
竿頭進一步耳

率更正書出大令森森若武庫矛戟虞永興稱其不擇

帝筆高麗亦知愛重遣使請之其名重如此是夢奠帖共七十六字而清瘦古健遒勁之中不失腴潤較化度醴泉銘不無少變乃字畫之妙不在二帖下正如郭林宗雖標格極峻而虛和近人他書未免作李元禮謾謾松風矣

真書鍾繇宣示力命尅捷右軍樂毅畫贊黃庭告誓霜寒大命洛神六朝不知名氏曹娥平叔子遺教陶弘景瘞鶴舊館壇智永千文虞世南孔子廟碑歐陽詢九成宮

化度寺虞恭公褚遂良哀冊聖教張旭郎官顏魯公麻
姑仙壇放生池中興頌千祿字東方朔贊柳公權院羅
尼

行鍾丙舍吳人羸頓雪寒長風右軍蘭亭極寒麥熟官
奴快雪來禽奉橘聖教序開元寺大令地黃歲終衛軍
授衣阿姨驚羣歲盡夏日奉對思戀天寶吳興黃門山
陰東風轉勝相過驚還觸事夏節恨深黃耆礬石駱驛
月內尊體謝安八月五日褚遂良枯樹李邕婆羅樹張

從申玄靜

晉人書雖非名法之家亦有一種風流蘊藉之態綠當時人士以清簡相尚虛曠為懷修容發語以韻相勝落筆散藻自然可觀可以精神解領未可以言語求覓也譚子國轉運汪石玉輯於峇山房中

拾遺

淳化閣帖無銀錠本

祖帖在世余足跡海內屢見兩三部其中合湊者多皆

非初榻內有銀綻紋為後榻無疑原傳宋太宗詔諸大臣購天下名蹟摹勒藏內府故不多傳後又為王著翻刻又差一層矣至著刻者余亦見之前有王著二字然閣本以紙墨為貴此帖紙是澄心堂墨是廷珪有目力者一見了然自明即不多見者亦知神彩奕奕為神物不知何由至江南得藏余齋也可勝欣幸餘清齋主人自識

宋榻淳化閣帖海內無全本惟嘉項庶常有十卷亦史

明古華東沙兩家合併而文待詔為之和會者庶常珍
祕雖千金不與人一觀無論購也今吳用卿忽視余此
十卷紙墨精好筆意備全又在項本之上何幸晚生見
此奇寶 戊午二月董其昌題

珍觀淳化原本如探龍得珠得未曾有堪與項氏千金
帖並傳 陳繼儒題

淳化閣帖行世後一經黃長睿之刊誤再經王弇州之
抨擊而王著幾無處生活長睿既識其不深書學又昧

古今而弇州直嘲之為手如懸鉤腹無半冊史在且謂
當時三館無糾正者每一開卷便為王著村老供一胡
盧董狐之筆不啻嚴矣而波磔督策喻糜側理不能不
歸美于摹榻之工蓋八法所在又何拘時代官位間余
論閣帖惟以墨黑甚于漆字豐濃有神者即為真初榻
本如兩府被賜親贈遺文章家雅語何從沾沾辨之哉
用卿留心古法書此帖極為其所珍賞第五卷智果何
氏帖皆全并無烏鎮福清三山殿司之疑也雁門文震

享題

余昔於安將軍處見此帖紙墨精妙快人心目辛酉秋
余在京陵吳用卿出其淳化閣本示余不覺神情頓還
舊觀 東山太白

仙機題為安將軍之藏想安將軍定是大賞鑒家方有
此耳但不知安將軍為何處人謫仙之言諒有所據即
其書使二王復起亦當服之也吳廷

丙戌中秋余止角里清靄閣東與居停主高君看舊時

月色出淳化無銀錠本示余云是其家玄期所遺玄期
與余自幼金石交知其精于鑒古況得自吳江村在在
稱米家書畫船者兩人宜識拔此帖帖後歸任公給諫
而寶書為左袒因復歸之永為高氏物不啻華氏和合
矣第紙墨如新幸得陳董諸公而鑒定乃雜亂後余共
兒淵幸獲觀神物哉何玉識

山谷道人題榮州祖無大師元上人詩如爐鑄鐵而筆
力遒勁字勢飛颺貌虎鬬爭龍蛇變化莫測去來之迹

是殆日月星辰彰于天山川草木形于地而不知孰使之然也詩句字畫稱唐之盛也詩如李杜書如顏柳無加矣至宋元祐熙豐間乃有道人者出不惟可以追駕古人遂至兼取衆長集之一已近臣諸公詩句如村店酒望字畫如妓館歌兒而去古人益遠矣吾於是卷蓋三嘆云吉州文天祥

山谷老人以善翰墨鳴於宋元祐間與東坡先生并驅雖米蔡諸公亦出其妙也予嘗求見之而不得袁清容

學士以珍藏答王周彥卷出示其書法之妙氣吐煙雲
神拂星斗絕非他卷可及予覽焉不忍釋手丹立生柯
敬仲跋

黃文節公答王周彥詩卷筆法妙絕氣韻飛動優入神
品乃卷法書第一此亦希世之寶豈易得哉袁清容學
士博古知今鑒定真蹟尤為寶愛不惜重價收之且山
谷嘗用澄心堂紙惟此卷用粉箋及李廷珪之墨謂之
三絕於此閱之豈非幸歟浦城楊載跋

家藏古人翰札自南晉鍾王後法帖并唐如柳公權輩
者法書數卷惟宋黃山谷卷自有奪天工之妙觀之得

趣處精神已為其

開

焉而不

開

者柳莊自跋



珊瑚網卷二十四下